

Mir sinn on de Stondort Flerschem gebunne

Als merr om letzde Freidaach mett unserne Dutte voll Gemies unn Salat uffem Markt gestonne unn geschwätzt hawwe, de Schorsch unn ich, doo sacht uff oomol de Schorsch: Honnes, ess sterwe ewe so vill Leit, moonsde nit aach?

Doo habb ich dem Schorsch zur Antwort gewwe: Ess sinn schunn immer vill Leit gestorwe, nor heit kenne merr se all, dess iss de Unnerschied.

De Schorsch hott genickt: Ja, dess iss de Unnerschied. Honnes, was denksden du - mache mir noch e paar Johr?

Ich habb die Achsele gezuckt: Mir wisses nit. Kooner waaß dess. Awwer saach emol, was issen dess ferr e Frooch? Mir sinn doch all-minonner noch gut druff, denk ich. Unn mir wolle joo nechstjohr aach ersdemol noch sibzich feiern - dann sehn merr weider.

De Schorsch hott mettem Kopp gewackelt: Monchmol denk ich ... ach waaßde, Honnes, ich det gonz gern sesomme mettem Kättche noch e paar scheene Audotourn mache. Wennde ersdemol uffem Kerchhof liehst, dann bisde so ... so on de Stondort Flerschem gebunne - unn dess det merr noch nit so gefalle.

Doo musst ich lache: On de Stondort Flerschem gebunne! - dess habb ich aach noch nit geheert. Schorsch, du unns Kättche, ihr kennt noch vill fortfahrn, ihr habbt doch nix – ihr kennt sogar noch Wooking mache. De Karl hott mer verzählt, du unns Kättche, ihr det jetzt sogar mitte im Friejhohr mett Schistecke doorumlaafe, er hätt eich om Moo geseh. Stimmt dess?

Ja, sacht de Schorsch, dess stimmt. Unn dess mett de Stecke nennt merr Nordik Wooking unn dess iss e gut Training ferr de gonse Kerrber, ferr die Boo, die Ärm, die Schuldern unn vor allem ferrs Herz unn de Kreislauf.

Ich frooch: Unn wie geht dess? Doo nimmsde oofach so zwaa Stecke in die Hond und marschierst los, odder?

Naa, schittelt de Schorsch sein Kopp, so geht dess nit. Als ersdes dusde derr e Buch kaafe unn dust dess emol lese. Unn dann machsde enn Kurs, den konnsde hier beim Gesundheitsverein mache. So mett e paar Leit iss dess außerdem enn mords Spaß. Unn wenndes richdich machst, werrdsde so schnell nit mied unn konnst vill weiter laafe als ohne die Stecke, mir habbes probiert. Dir det dess aach nit schade, wo du immer nor mettem Audo erumfährst.

Na komm, sach ich, dess mettem rumfahrn iss aach nimmi so, bei dene Benzinpreise. Mir werrn bald dess Audo efter in de Garasch losse misse, denn wenn ich dess richdich seh, dann werd de Sprit so schnell nit billicher, Die Amis kaafe alles sesomme wasse kriehe könne, weil die hawwe Ängst vor Sabotaasche in de Ölländer,

die Spekulate sinn in dem Geschäft drin unn aach die Ökosteier werd nit wenicher. Naa, ich denk dass dess noch e Zeit so weitergeht mett dem deierne Benzin – unn dann wollese noch Maut kassiern.

De Schorsch wackelt mett de Dutte: Ja was moonsde dann, wo unser Rente doch immer wenicher werdd, was mir dann mache solle?

Ich grins: Dehoom bleiwe, Nordik Wooking uff die Wissemiehl odder nooch Wicker mache, enn Hondkäs esse unn enn Schoppe drinke, doodeferr werds noch immer longe.

Ja, dann wärn merr doch ... de Schorsch mächt e gonz belämert Gesicht.

Richdich, Schorsch, sach ich, dann lewe merr noch unn wärn doch schunn on de Stondort Flerschem gebunne.

Eiern Honnes